

東
華
續
錄

東華續錄

乾隆七十一

臣王先謙敬編

臣周澍著恭校

乾隆三十五年庚寅春正月己卯朔諭朕承丕緒撫有萬方申
旦求衣無日不以勤恤民依爲念是以劭農省歲減賦追徵不靳
多費帑金靳閭閻共臻康阜溯在乾隆十一年丙寅朕御宇周旬
聲敷閭澤曾恭依 皇祖普免天下錢糧恩例蠲除直省額徵正
賦二千八百萬有奇越在三十一年丙戌際當必世興仁益惟比
戶饒裕是計復下詔將應徵漕米省分照康熙年例槩蠲一次俾
各省倉箱盈衍倍積耕餘邇年以來寰宇乂甯民氣和樂惟 上
天自佑我邦家游錫康年頌符綏履朕祗膺 昊蒼鴻眷其可不
究澤推仁以與我海內元元答茲 嘉貺我國家席全盛之模內

外經費度支有贏無絀府庫所貯月羨歲增因思天地止此生財之數不在上卽在下與其多聚左藏無甯使茅簷蔀屋自爲流通遇者仰紹 列祖貽庥化成熙洽爲民藏富欣際斯辰且今年朕六十誕辰明歲恭逢 聖母八旬萬壽普天忭祝慶洽頻年尤從來史冊所未有是宜更沛非常之恩以協 天心而彰國慶茲用乘春頒令誕布陽和著自乾隆三十五年爲始將各省應徵錢糧通行蠲免一次其如何分年遞蠲之處著大學士會同該部卽速詳議具奏○庚辰諭今年八月舉行恩科鄉試來歲三月舉行會試○諭彰寶甫到滇省督辦糧馬諸務俱能妥速經理及擢用總督以來亦頗知實心任事著加太子太保銜以示優獎○諭各省輪捐之年勸諭業戶照蠲數十分之四減佃戶租○命封七公主爲固倫公主○丙戌諭國家熙洽化成薄海共躋壽寓昇平人瑞

實應昌期是以每歲直省題報老民老婦年至百歲及百歲以上者不可勝紀因思向來所頒時憲書後葉紀年止載花甲一周爲斷殊不知周甲壽所常有而三元之序數本循環成例拘墟未爲允協著交欽天監自乾隆三十六年辛卯爲始於一歲下添書六十一歲仍依干支以次載至一百二十歲則開表犁然期頤並登正朔用符紀歲授時之義○乙未諭軍機大臣等昨因緬酋尙無奏表信息恐有遲回觀望情形不可不留心防範已傳諭酌留貴州兵丁分駐永昌等處協同戍守今據彰寶奏稱老官屯頭目布拉莽儒兩處差人呈送檄葉緬文欲通貿易等語看來緬匪前次籲請解圍實不知我兵聲勢幾路進師故懼而請命及許其撤兵以後必窺見我兵有不得不退之勢遂將奉表一事置爲緩圖或並且悔其前說則沿邊一帶斷不可不豫爲防備但滇省綠營兵

實在惟怯不堪卽哈國興力爲整頓亦須數年後方可冀其改觀此時必不能適用著阿桂彰寶卽遵前諭選派貴州兵丁二千名於永昌及沿邊要隘處所與滇兵分配駐守庶乎得濟雲貴同一總督所轄調撥最爲便易且綠營兵口糧不至如京兵之繁費卽令其多住一兩年亦無不可但須不動聲色妥協經理作爲尋常善後事宜一例籌辦不必令眾人知此底裏方合機宜至貿易一事緬匪急於相通觀其兩次所遞之書情詞畢露幸朕諒爲料及節次諭令俟其奉表後再行奏聞許通交易是以此次所給回書尙得要領不至仍以姑息了事總之緬匪降表一日不至一日不可許其與內地通商此一節乃中國制馭外夷扼要之道把握自我而操最爲長策從前之準噶爾近日之俄羅斯皆如此籌辦把守關隘乃總督專責著彰寶選派妥幹員弁於各邊口實力防詰

不許內地商貨絲毫透漏於事庶爲有濟彰寶尙係認真任事之人此事尤當實心董察若稍不經意致官弁等仍以具文塞責或有疏懈之處惟彰寶是問若緬酋已奉表納款果屬誠心卽可奏聞許令通商卽滇兵亦無庸留駐阿桂彰寶惟當隨時妥協經畫副朕諄切籌諭之意並諭令傅恆知之○己亥調曹秀先爲戶部侍郎以徐績爲工部侍郎○癸卯吏部等部議覆原任貴州巡撫良卿奏威甯州向轄猺夷爲苗疆要缺五年俸滿加銜留任再滿三年升用今番民向化日久撫綏較易應如所請刪去報滿加銜卽升之例照內地題缺揀補從之○丙午平定準噶爾方略告成御製序曰平定準噶爾方略書成纂言者以序請夫序者所以序其事之本末而因文以悉其肯綮也事之本末則方略三編盡之矣太學之碑磨崖之銘西師之詩開或之論亦旣悉其肯綮矣

如是則可以不煩重序雖然五年之間大勳兩集又十年而後書成是不可以無序且朔漠金川前例具在也乃允其請而爲之序曰功不可以虛成名不可以僞立幸不可以屢徵志不可以少侈夫用兵中國自古爲難而況踰沙漠天山萬里而遙乎旰斯宵斯劬劬以至有成功非虛而名非僞是僅可免後人之指摘耳若夫揚揚自詡以爲誠若能操必勝之券則不惟致物議而貽口實於心亦誠忍若也藉眾之力幸底於績然我士卒之櫻鋒鏑者不爲少矣故此書之輯率因忠魂義魄不忍令其泯沒無聞具載以誌之而猶不在於擴土開疆之爲也旣平準噶爾延及回部悉主悉臣耕作賦役興焉此亦一再徵幸矣而猶不自知足欲屢試我銳而別有圖是志侈也志侈者不祥故近日撤征緬兵之旨甫降而彼適投誠我兵振旅以還告成事焉此非盈虛消息之理捷若響

應乎是則此序之作不惟回思而若有驚亦且永圖而懷有戒也
○丁未吏部議奏前任貴州布政使張逢堯於巡撫良卿養廉贍
徇透給又自行豫支請照不應重私罪例降三級調用得旨前以
劉標揭報上司婪索案內張逢堯尙無染指情事是以加恩仍令
降補運使今於巡撫養廉既徇情透給又復自行豫支且伊身任
藩司有整飭通省屬員之責乃以劉標等如此虧空纍纍並不卽
爲查參一任姑容敗檢致貴州省吏治官方狼藉若此而伊僅以
斤斤自守冀爲卸責之地國家於此等頽廢職守之藩司將安所
用之若僅照部議就其透給豫支一節予以降調不足示儆張逢
堯著革職發往軍臺效力贖罪○授喀爾喀和碩親王成袞扎布
世子額駙拉旺多爾濟爲固倫額駙○浙江巡撫熊學鵬奏恭逢
巡幸天津應督率浙商慶祝並以浙商情殷祝嘏請公備銀十萬

兩佐萬佛樓工卻之

二月己酉諭良卿在熱河道任辦事尙知奮勉是以加恩擢用巡撫豈意伊志滿意足又恃地遠或易爲欺乃於劉標虧空一案發覺後經永泰等前後揭部控其與臬司高積交結並勒索餽送各款因特派吳達善等前往查審節據訊出良卿與高積受賄交通聽其販賣水銀並任幕友往來無忌已屬敗檢不法至劉標積年虧帑侵公數至二十四萬有餘良卿旣已明知故縱並授意令人彌補復請添移錢局冀爲通融掩覆及經部駁知事必敗露始以一參塞責又不嚴追虧項輒批令將出借銀兩私留作抵不行列入查封款內而於平越府之私交兵米折色侵蝕口袋腳價等項並不覺察劾究是其徇縱劣員毫無顧忌致通省效尤罔知檢束吏治官方不可復問良卿負恩若此實出情理之外甚至普安州

民人吳國治告官吏科派一案不卽嚴行查辦轉令被控之本州知州陳景一同會審致使抑勒勸和顛預了局是其心存消弭喪盡天良公行欺罔並不止於飭法焚賊封疆大吏敗裂至此天理國法尙可復容乎良卿著依擬處斬卽於貴州省城令欽差大臣監視正法俾各省督撫共知炯戒至方世雋在黔擔任內婪索劉標貨物並於開礦一事受賄盈千其罪亦無可逭但所犯專在得贓較之良卿欺君長奸目無法紀者尙屬有閒方世雋著從寬改爲應絞監候秋後處決並將此通諭知之○庚戌 上御經筵○吏部議覆經略大學士公傅恆奏雲南外連夷疆地方遼闊從前欲借大員彈壓設郡至二十三府之多今諸夷向化原設冗繁應如所請雲南府爲省會大理府爲提督駐紮地方曲靖臨安楚雄昭通澂江屬邑俱多東川爲礦廠最勝之區開化界接安南麗江

通連西藏永昌順甯普洱臨緬邊地且郡境廣闊均照舊存留武定府轄二縣一州元江鎮沅二府無首邑轄一廳二州不成郡均改直隸州武定既改州所屬和曲州裁祿勸州改縣同原轄之元謀縣俱歸武定直隸州轄元江府屬他郎通判鎮沅府屬威遠同知不便歸州統率改附近普洱府轄廣西府屬五嶺通判改附近曲靖府轄元江府原轄之新平縣歸元江直隸州轄鎮沅府原轄之恩樂縣歸鎮沅直隸州轄廣西府原轄之師宗彌勒二州俱改縣歸廣西直隸州轄姚安府僅轄一州一縣不成郡應裁姚安原轄之姚州大姚縣歸附近楚雄府轄鶴慶府本有原管地方距麗江僅八十里改州與所屬之劍川州歸麗江府轄廣南府止有同城之寶甯縣不成郡改直隸廳同知寶甯縣同城應裁改設照磨一員以資佐理又永北蒙化景東三府無屬邑不成郡但地方遼

闊距府屬遠歸併他郡一切徵輸審解未便將永北蒙化景東三府均改直隸應同知麗江順甯二府無首縣與體制不合應將專管地方改首縣管理臨安府首邑係建水州改縣以符體制從之
○庚申飭禁督撫指名奏請揀發○壬戌諭前以阿思哈簡任雲貴總督甫到滇省軍營卽心存恇怯以兵馬糧石辦理竭蹶情形屢行入告其時正當大兵督剿阿思哈以總督專理軍需不思設法籌辦輒爲畏難之語豫占地步不願搖動眾心關繫甚重因節次降旨將伊革職留於軍營效力贖罪嗣於大兵旣撤之後念伊前奏尙非由於虛捏且覈其平日辦事亦不至竟當廢斥是以加恩授爲吏部侍郎今阿思哈來京召見奏對時仍申其糧馬難於措辦之說及詰以彰寶到滇在後何以購備轉得充裕而先任總督者竟至束手無策阿思哈始無辭以對若謂經略大學士傅恆

此次進兵過早致諸事難以豫備阿思哈何妨據實參奏朕亦得早爲裁奪乃又見不及此徒爾先事張皇不知通盤籌畫大臣爲國任事之義安在及我軍攻圍老官屯經略傅恆奏其水土惡劣疾病相仍朕知不宜久駐傳諭退兵而緬酋亦適遣人詣軍營懇解圍情願奉表納款因俯從所請以完此局設我兵至老官屯竟無病患而緬夷又不投誠亦卽當中止乎至詰以革職後作何效力之處據稱同諸大臣督率官兵攻戰其言更荒唐可笑阿思哈係滿洲世僕旣革職留營卽與兵丁無異况以曾受重恩之大員獲罪急圖自效理應衝鋒殺賊奮不顧身乃猶覲顏附於大臣之列不肯親冒矢石以巧遂其選懦偷安之計是誠何心如奎林等以領隊大臣而於老官屯攻打賊寨身先士卒受有重傷阿思哈豈未目擊乃以白身自效行閒之人仍然養尊自重毫不知感

激愧奮是其漸染錮習甘於委靡無用全無滿洲勇往誠樸之氣
又安望其改悔振作乎卽此一節其心更不可問而罪更不可道
阿思哈仍著革職發往伊犁自備資斧效力贖罪朕於諸臣功過
應黜應陟一秉大公從不稍存成見如其人雖曾罹罪而情節略
有可原未嘗不棄瑕錄用儻竟執迷不悛有恩而不知感有罰而
不知懼則又當顯示創懲俾眾人共知儆惕阿思哈乃其明驗要
之一予一奪悉視其所自取初無絲毫偏倚於其間也將此通
行諭眾知之○諭良卿原係包衣佐領小戶施恩用至巡撫乃任
意欺罔孤負朕恩覈其所獲之罪實難容於旗僕之內理應將其
子孫一併正法著施恩將良卿之子富多富永免死銷去旗籍發
往伊犁賞給厄魯特爲奴富多著卽帶領發往伊弟富永解到亦
卽發往○乙丑 上奉 皇太后謁 東陵○己巳 上謁 昭

西陵

孝東陵

景陵至

壽祺皇貴太妃

溫惠皇貴太妃園

寢

孝賢皇后陵奠酒

○庚午

上奉

皇太后回鑾駐蹕盤山

○王申諭軍機大臣等征勦緬匪一事因老官屯水土惡劣我兵在彼疾病者多勢難久駐是以降旨撤兵適緬酋情駭遣使至軍營投誠姑允所請以結此局雖不過就事完事其實亦不能不如
此辦理但緬酋既誠心投順何以距今三月餘向無信息看來其
初遣人投誠時必係聞新街戰勝之信懾我兵威且不知我兵聲
勢若何遂爾懼而請命及我兵既退彼或窺見端倪漸生觀望且
其遣使至軍營時係哈國興與之接見傳語未必非哈國興狂於
綠營積習急圖了事從中遷就調停爲之粉飾其詞竟若緬酋實
能恭順輸誠者至渾覺本一茫無定見之人其在猛拱投降原係
爲興堂扎尋至迫於無可如何今遣伊回歸緬境必誘罪於興堂

扎而將我軍中虛實盡行告知以圖倖免緬酋聞此必且悔其前此投誠之舉不然彼卽辦理貢物何至濡遲許久且如前此呈送軍營瓊布諸物未嘗不可以充貢彼何所畏懼必欲造辦奇巧貢品曠日稽時且彼土又有何奇物可辦必待遲之又久不卽奉表納款急踐前言乎緬酋旣如此遷延其情僞殊不可信彼所略有顧戀者惟貿易一節急欲求通中國而內地亦惟此一節尙足以扼其肯綮總之彼貢表一日不至沿邊貨物一日不可令通此時務須設法嚴查勿使奸劣商民絲毫透漏若稍有疏漏仍歸有名無實則並此不足恃更復無可把握所繫非淺鮮也更可慮者緬酋或知我進兵時糧馬運送之難及將士病損者眾而見在八旗勁旅又俱撤回彼深悉滇省營兵之怯弱無能益復無所顧忌或漸擾我沿邊土司地界亦未可定今永昌騰越尙有黔兵屯駐較

滇兵稍爲得力萬一匪酋或有侵擾雖不值復爲征勦而就近揀
派留駐黔兵統以勇敢將弁出邊剿殺盡殲醜徒使知儆畏庶足
示威杜患並當一面辦理一面奏聞前此緬匪之事皆由愛必達
吳達善劉藻厯任總督之姑息養癰繼以楊應琚之乖張債事縱
令賊匪日肆鴟張遂致大費兵力經理數年仍不能集勦賊事此
因循貽誤之咎不可不引以爲切戒也彰寶向日頗屬能事到滇
以後又能實心出力是以卽用爲總督此時旣已撤兵卽阿桂亦
不能在彼久駐滇省沿邊諸事乃伊一人專責朕亦惟伊是倚哈
國興雖在滇年久究係武夫識見有限或並沿襲綠營惡習遇事
一味掩飾彌縫止圖弭目前之非而不顧貽後來之患彰寶斷不
可爲其所惑與彼扶同一氣上下相蒙也若稍不經意措置不能
合宜或緬匪侵擾沿邊不知痛加懲創甚且匿不上聞設或賊眾

漸至闌入內地並且侵及騰越永昌尙能諱匿乎若至彼時再行
奏聞朕惟於彰寶是問楊應琚覆轍具在是爲炯戒卽彰寶自付
亦復何顏見朕乎著傳諭彰寶務須實體朕意以副委任仍將見
在邊禁如何嚴密訪查及緬匪有無貢表消息卽行奏聞並將此
諭令傳恆知之尋彰寶奏緬性多疑眞僞難定前遵旨留黔兵並
雲南昭通兵共三千餘名分令昭通鶴麗永順三鎮臣帶駐虎踞
關之隴川及盡達遮放等處嚴查商賈偷漏又於沿邊小口嚴飭
地方官防範其永昌騰越沿邊道路添派弁員稽查見據永昌守
令報於龍陵訪獲違禁私販外夷鹽斤之人再查緬夷從前貿易
俱在秋冬間詢土人知交四月後雨大瘴發道路難行不能通市
其進貢尙無消息各處官兵星羅碁布聲勢聯絡俟有瘴時酌移
龍陵南甸等處離各關隘不遠聲氣相通緬夷必不敢犯邊設有

侵擾定率弁兵勦殺如遇事有未得主意處惟據實奏聞緣營怯弱而永昌騰越尤甚地較緊要見在選練操防有截存糧可敷留駐兵支用得旨此亦尋常覆奏何亟亟六百里爲也○裁雲南永北鎮改設參將一裁曲尋楚姚總兵各改設副將一○癸酉阿里衮靈樞到京命 皇四子永琰 皇十二子永璘散秩大臣侍衛等往奠

三月己卯 上奉 皇太后還京師○傳恆奏明德雖不能脫盡外省積習但久任封疆較喀爾阿爲諳練見雖總理軍需而動支酌撥專倚藩司今已撤兵儘可令錢度接辦兼飭臬司諾穆親協同辦理明德可以脫身赴黔再湖南撫臣宮兆麟臣昔議其人任臬司時審訊侯七郎一案不肯聽從巡撫常鈞尙無附和習氣且曾歷雲南藩臬可以駕輕就熟與喀爾阿對調得旨所奏是已有

旨了○辛巳召喀爾阿來京調宮兆麟爲貴州巡撫以吳達善兼署湖南巡撫○吏部議奏外省查參之員由保舉得官者奏摺中多不將原保官附劾應請飭行如漏者一併議處至奏請調繁自與保薦有閒然亦應不時稽查有不加奮勉頓改前操者卽分別嚴參或該上司以甫經調繁曲爲徇隱別經發覺照徇庇例降三級調用從之○壬午 上奉 皇太后啓鑾謁 泰陵巡幸天津

○都察院議奏吏部侍郎羅源漢在順天府尹任將出身不正之幕友程芬混行送考應降調得旨都察院議處吏部侍郎羅源漢前在順天府府尹任內將出身不正之程芬濫行移送中式一本將羅源漢議以降調向來諸臣公過處分本內朕必量其情事並疑其人才多有加恩仍予留任者至士子送考事關大典順天府尹給文理應慎重况程芬以出身不正之人在署作幕其生平履

歷斷難諉爲不知卽云知之未真乃因其懇求直用府尹公文移送一切地方加結俱可不用是直府尹身爲作弊豈尋常公過可比且羅源漢屢經升用存至侍郎於各任應辦之事多係俯仰隨人從未見其稍有自見之處亦難更事姑容致療職守但若僅照籤批發外閒無識之徒或疑朕未加詳閱不知朕於諸臣功罪銖兩輕重務令悉協其平卽尋常議處本內無不留心檢覈豈於大員進退轉肯稍爲因任乎羅源漢著照議降二級調用○癸未諭軍機大臣等前以緬酋奉表納貢遲遲未至情僞殊未可信而內地之尙足扼其肯綮者惟貿易一節業經明切傳諭彰寶令於沿邊一帶實力嚴查勿使奸劣商民絲毫透漏因思緬酋所以遲疑不至之故必係我兵昨歲退撤時彼已窺見端倪而渾覺一去更得悉我軍中底裏未必不悔其前此投誠之舉故爾觀望遷延然

此兩端但能得我軍營虛實而於內地辦理糧馬情形彼尙未深知也特恐邊地莠民視竄入緬地爲常事如前此尹士賓等皆騰越州人至流爲漢奸安知無從而效尤者此等無藉之徒罔知大義惟利是圖儻或逸出邊外竟將我邇年辦理軍需情事備細告知以博其安身牟利匪首若更知此閒虛實益復無所顧忌或致復生事端所繫非細此時邊隘官弁於稽查貨物自不敢不實力奉行而於隻身行旅或不知加意防閑致容偷越於邊防大有關係彰竇務宜嚴飭各關隘一體實力查禁毋使一人得以潛蹤越邊方爲妥慎若督察稍有懈弛仍然有名無實致奸徒竄匿滋事惟於彰竇是問至緬酋所請遣人進表一節迄今三月餘杳無信息儻竟置之不問非威懾外夷之道或恐轉爲所輕且奉表納貢尙可聽其自至毋庸督促至所云送還羈留內地人民則不便聽

其不遵教約因令軍機大臣代阿桂彭寶擬寫檄諭緬酋文稟伊等接到後卽速選派明曉緬文之人譯爲緬字並連漢字發往其作何寄發之處著阿桂彭寶妥酌辦理選派安幹都守一員隨帶二三十人齎檄赴老官屯交該處頭目皓爾塔等令其卽行轉遞阿瓦速取回信無庸多領兵眾致啓疑懼並令該員告知該頭目以奉將軍總督諭令將來檄交爾等轉達我等交付後卽回駐虎踞關聽候信息如有回稟卽可遣人送至關口如此方爲妥協視其如何稟覆卽速據實奏聞阿桂奉到此旨時如已離滇省卽無庸復往永昌可暫駐雲南省城與彭寶札商妥辦且阿桂回京本無甚應辦要事卽在滇候緬酋信息再行起程亦無不可若此旨到時緬酋所遣之人已至邊內或將抵關門得有實信卽可無庸寄去阿桂亦卽可回京設貢表雖至而內地被留之人尙未送還

則又當另爲檄諭並不可允其違通貿易卽應奏聞候旨遵行將
此諭令阿桂彰寶知之外寄軍機大臣代擬檄諭一道檄諭緬甸
國王知悉爾緬甸僻處炎荒久阻聲教我大皇帝憫爾遠夷蠢
愚置之化外然猶聽邊氓與爾國交易俾裕爾生計阜爾民人恩
至渥也乃爾自作不靖甘棄生成竟敢擾我邊外土司甚至闌入
內地侵軼無忌是爾不知感戴聖主格外包容自絕於天罪無
可貸前督院等因統兵問罪爾猶負固不服抗我師旅爾惡益盈
我大皇帝尙不忍遽加殲滅惟飭我邊防斷爾貿易冀爾或知
悔罪仍可曲賜矜全乃待以一年爾竟冥頑無知始終執迷不悟
實爲覆載所不容國法所難宥於是始命經略大學士忠勇公傅
恆偕本將軍本督部院等統率八旗勁旅及各路精兵水陸並進
厚集征剿我經略及本將軍等恭膺簡命督策將士奮勇爭先巨

破強弓威武無敵去秋自夏鳩濟師卽收復猛拱進次新街兩岸
夾擊繼以舟師遂盡破爾棚奪爾船寨爾囊射殪爾頭目殲戮爾
醜徒爾眾之僅存者喪膽奔逃勢如瓦解我大軍乘勝進攻老官
屯數日之間拔爾江岸數砦並晝夜攻圍大寨礮矢交加爾眾力
不能支破在旦夕爾懾我兵威自知危窘從阿瓦遣人至老官屯
同彼處頭目諾爾塔爾爾書詞詣我軍營數次懇請解圍情願奉
表納貢送還內地被留人眾情辭迫切恭順有加我經略及本將
軍等因會奉 大皇帝恩命以緬酋如或自知悔過納款投誠姑
免縛其巢穴臨時奏聞定奪遂暫退六軍據爾呈詞星馳入告衆
大皇帝如天好生鑒爾誠悃俯允所請降旨班師以全爾眾乃
爾自上年十一月遣人奉書以來距今數月負教夷約竟不稟覆
是何情理今大兵雖暫退大學士忠勇公雖遵旨還朝襄贊政務

而本將軍尙在滇省本督部院亦董理糧馬軍械坐鎮邊地以觀
爾動靜爾之奉表遲速本不足計以我中國撫有函夏東自高麗
琉球及東洋西洋諸大國南則交趾以南諸國北則準噶爾全部
西則回部數百城並入版圖歲時朝貢何物蔑有爾彈丸僻壤卽
竭力具貢有何珍異足以比數原無所容其督促且爾貢表一日
不至內地貿易一日不通爾果安於自誤更無庸代爾籌畫但爾
所稱送還內地被留之人有何難辦有何顧慮而遷延許久信息
杳然殊不可解設我大皇帝詢及爾遲延之故本將軍等豈肯
爲爾掩飾欺罔乎抑爾前此敢以鬼蜮伎倆巧爲嘗試乎萬一
大皇帝責爾欺慢之罪復命本將軍等率兵進剿爾自度爾國力
量尙能當我大兵之壓境乎爲此開誠剴切檄示爾速自熟思審
處決擇禍福迅卽具稟申覆送還內地人眾則爾國土地人民庶

得安全儻仍游移觀望後悔無及爾自度之特檄○命辛卯年十

月正科武鄉試於恩科武殿試傳臚後舉行○調曹秀先爲吏部

侍郎蔣賜棨爲戶部侍郎以歐陽瑾爲倉場侍郎由順天府尹遷○以

德福署湖南巡撫秦鏞爲湖北按察使由荆宜施道遷○曾曰理以不職

革職以郝碩爲浙江按察使由山東登萊青道遷○丙戌 上謁 秦陵○

丁亥阿桂等奏木邦土司線鹽團蠻暮土司瑞團等稟稱已與緬

夷爲仇回本處恐被殘害懇求安置內地擬於沿邊附近之永昌

蒙化大理一帶擇地安插量其家口多寡建屋給田查大理府屬

並蒙化地方有舊存馬廠官莊田可撥給其搬移家口略給路費

於軍需報銷再猛密司所屬孟連土目線官猛於三十三年投誠

住隴川之戶南山地土荒蕪生計維艱應一併賞資安插又夏鳩

投誠之土目賀丙係瑞團所屬見已飭傳俟其來日一體安插得

旨如所請行○戊子廣直隸學額○己丑免經過州縣及天津府屬三十一年至三十三年積欠地糧銀及常借災借穀石○免直隸三十一年至三十三年積欠地糧銀及折色銀兩○庚寅上閱文安隄○減直隸軍流以下罪○免直隸三十一年至三十三年因災緩徵銀兩穀石○甲午上奉皇太后駐蹕天津府○丙申上閱駐防兵○召見自雲南還京經略大學士公傅恆○丁酉諭前據楊廷璋奏直隸辦送雲南振旅官兵係循照舊例每兵三名給車一輛跟役搭坐而河南省此次供應兵車係二兵連跟役給車一輛等語因降旨富尼漢令將何以不照成例辦理之處明白回奏今據奏稱係據藩臬兩司並驛道會議辦理實屬錯謬等語振旅之師三兵一車向來並無不敷乘坐之事富尼漢於司道議給官兵車輛時並不查照舊例覈明駁正率意辦理甚屬

不合著交部嚴加議處所有會議率詳之司道亦屬非是著交部一併嚴加議處○戊戌 上奉 皇太后回鑾○召富尼漢來京

調承德爲河南巡撫以薩載署江蘇巡撫李湖爲江蘇布政使裴

宗錫爲直隸按察使

原任直隸按察使

○諭軍機大臣等朕恭奉 皇太

后巡幸天津適山東巡撫富明安至此迎鑾奏稱山左臣民望幸

情殷請於明春掖 輦登岱承 歡祝 釐情詞極爲誠切因念

曲阜自壬午南巡回鑾臨謁 孔廟以來已屆十載而見在發帑

修理泰安岱廟及山頂碧霞宮將次落成明歲恭逢 聖母八旬

萬壽 慈諭亦欲親詣拈香遂面允所請諭令毋事繁飾俟另降

諭旨舉行東巡之典江南與山東接壤恐地方官聞有此信亦欲

效其所爲則斷乎不可乙酉南巡時因念 皇太后聖壽漸高江

浙路程紆遠川途跋涉未免過煩曾諭督撫等此後不必再爲南

巡之請今以山東距京不過十餘站水程多而陸程少乘舟安適
尚屬可行若江南則道里數倍遠隔江湖往返動需數月勞頓頗
煩殊非養志頤安之道著傳諭高晉務須深體朕意卽東南黎
庶情切就瞻亦不可代爲陳請外省習氣每視鄰封舉動轉相倣
效恐高晉因山東舉辦東巡之信輒以必不可從之事妄行瀆奏
甚至豫爲部署朕非惟不允且當加以斥責將此並諭熊學鵬知
之○賞天津祝釐之浙商於每引額定鹽斤外加鹽五斤免輸
課一年○命淮南商賠項展限六年○癸卯上奉皇太后還京
師○丙午諭朕祇肅明禋恭遇郊壇大祀竭誠致愼向於致祭
園丘先期敬宿齋宮必躬詣神位前升香展禮其省親邊豆
臨期由禮臣請旨或循例遣官或降旨親莅而朕每親莅者多今
朕年屆六旬郊祀大典歲歲躬行卽將來晉表日高仍當弗懈

益虔惟是儀文品節之閒略宜折衷至當可以永遠率由行之無
數如先期赴壇時神位前允宜躬親展謁其省視蠶豆應按
例專遣臣工莅事不必更請旨至赴壇所經道路向由昭亨
門外降輦步履遙遠當質明行事轉恐失儀嗣後應改由廣利
門入於向時祭畢乘輦處降輦○定教職俸滿保舉知縣升任後
復行改教者議處原保之督撫學政例○是月四川總督阿爾泰
等奏小金川沃日兩土司爭地起釁用兵相攻由小金川土司澤
旺年老伊子僧格桑與多事頭人慫恿生事明正革布什咱各土
司勸阻不聽經委員前赴夷巢彈壓責以擅自發兵小金川稟卽
停止用兵但沃克什既詛伊父子致病又鬪時殺傷伊多人應照
蠻禮打傷人口罰賠命價求斷沃克什一二寨與伊耕種見飭委
員嚴行查辦務使多事者知畏退斂報聞

夏四月己酉諭軍機大臣等昨以緬酋奉表投誠一事爲時已久並無信息卽疑匪酋始而懼我兵威懇請解圍及我軍退撤時彼或窺見端倪且渾覺旣回該處斷無不將我軍中底裏告知彼必悔其前此輸誠之說節經諭令阿桂彰寶等留心整備邊防並擬發檄稟詢詰緬酋催其送還內地被留之人彼時卽疑匪酋狡黠或亦向我索還該處已經歸順之土司今據彰寶奏三月十四日有老官屯緬子四人持該頭目布拉諾爾塔蒲葉緬文來至虎踞關求將木邦蠻猛拱之土司放還伊處等語果不出朕所料今我傳檄未至而彼文先來轉以所辦落彼之後且使匪酋接檄後或疑我將軍總督等因彼書來方爲此答是前檄不能得力惜乎籌慮稍遲未及先發制人耳看來匪酋詭詐百出甚爲可惡此時雖不值復興兵征剿但其或至侵擾內地土司邊境不可不先事

豫防前因哈國興熟悉邊外夷情是以調爲雲南提督繼聞其於
緬酋遣使投誠時不無從中粉飾遷就是伊綠營積習錮蔽難拔
曾密諭彰寶留心防察不可爲其所愚今閱譯出緬文內稱滿洲
領兵大人向我大頭目說止要把話說明白木邦等三土司自然
給爾們之語則是哈國興昨冬與緬酋接見時顯存將就完事之
見信口應許成何事體若再留其在滇非惟無益且恐於邊務大
有關礙自不若長青滿洲世僕之足可倚信矣因降旨令哈國興
來京陛見仍將長青調補雲南提督並諭長青與彰寶同心合意
無分彼此共襄國事彰寶亦當深體朕意不得稍存畛域之見於
事方爲有益至緬匪貿易一事眾人皆以爲彼所急欲求通今閱
緬文並未提及交易一語則其不專以此爲重可知非若俄羅斯
欲通貿易可比蓋俄羅斯貨物較多若准其通商彼國每年可多

得數百萬金於彼大爲有益是以意多繫戀至緬甸蕞爾邊夷貨市有限獲利無多其所易內地諸物並非日用所急需且彼處向亦通洋並不專恃內地是貿易一節實不足以制其死命雖邊隘實力防禁不可稍有懈弛然謂嚴查商旅偷越卽可以杜後患尙非緊要關鍵彰寶等當知緬酋既有此舉或復潛萌滋事正未可定斷不可掉以輕心因循自誤爲掩耳盜鈴之計萬一匪眾敢於近邊略有侵犯務須奮力勦擊大示懲創不得稍存姑息若彰寶等不知實心任事措置失宜則楊應琚前事具在足爲炯戒至向緬酋索取內地被留之人尤爲國體所繫阿桂彰寶旣見彼降表遲久不至卽應早爲籌及向彼飭備乃必俟於萬里之外燭照遠及代爲草檄而郵程馳遞遂已後期機宜甚爲可惜且諾爾塔以蠻貊頭目尙知作書向我索取降人阿桂彰寶身爲國家大臣不

能早計及此所見竟出諾爾塔之下甯不知愧將此詳切諭令知之○癸丑諭九江粵海等關一年期滿報部請旨著爲令○甲寅四達因病休致以喀爾阿爲刑部侍郎○左副都御史傅爲訥以年老休致○庚申阿桂彰寶奏奉到諭旨並檄文卽遵旨譯寫交明白妥幹之奇兵營都司蘇爾相並明曉通事段彩霞撥路熟健兵二十名於三月二十九日齋赴老官屯交該處頭目速取回信俟回稟一到卽星飛奏聞得旨已有旨了諭軍機大臣等前以緬酋貢表稽遲未至情偽殊未可信因命軍機大臣代阿桂彰寶擬寫檄稟督促送還被留內地之人使彼知在滇辦事大臣識見遠到庶幾稍有忌憚或於事有益詎意前旨未到而諾爾塔來文竟有請還木邦等三土司之語是朕雖燭見幾先而到滇傳檄轉落緬文之後本欲先發制人變而爲應答後著前檄斷不能得力深

惜籌度之不早而阿桂彰寶身任國事漠然不知動念竟未謀解
及此其智實出諾爾塔之下爾不知愧業經嚴切飭諭今據阿桂
彰寶覆奏奉到檄票一摺僅稱派員齎送事宜而於彼此文檄往
來孰先孰後有濟無濟全無一語計及似此循分奉行誰則不能
阿桂彰寶平日尙非全不曉事者何遽懵懵若此殊不可解至諾
爾塔來文彰寶前奏未嘗不知其荒誕可惡而見在作何飭覆以
絕彼妄念且前檄已經譯發此次檄文又當如何措辭得體均未
奏及不知伊等所辦何事可見伊等惟思遷就完局苟幸無事而
於國體邊情漫不經意尙得謂之具有人心乎至阿桂另摺奏稱
准彰寶札緬子報遞文書求放還土司查上年緬子乞降時哈國
興同領隊各員在彼申明約束並未有給還之說必係緬夷見近
日關隘防範嚴密心懷疑懼不知內地作何辦理故爲此含混無

根之語探聽嘗試等語尤爲無識此明係緬夷窺見我撤兵時力不能支並聞渾覺告知軍中虛實遂悔其前此投誠之說且見彼已遷延四月餘而內地無片詞詰責深料我在滇大臣之無能心存輕忽故敢於侮玩若此乃阿桂等全然不知憤怒轉以賊情疑懼爲解其不知恥幾於唾面自乾矣又彰寶另摺覆奏體察哈國興一節稱哈國興面商親往龍陵勘辦移營諸務卽日可回永昌等語亦不明晰彰寶前奏以諾爾塔來文有哈國興許其給還三土司語行文詢明覆奏當於摺內批令喚問哈國興彼時尙以哈國興與彰寶相隔遼遠自須卽行檄調面詢乃該提近在龍陵距永昌不過三百餘里謂詢更非難事何遲至十餘日尙不問明且哈國興自軍營回程卽在永昌同彰寶辦事已將數月於居心行事豈竟略無所見經朕傳旨密問之後始欲俟其復回永昌再行

察看則其平日之不以事爲事可知彰寶初至滇省尙知認真何亦模稜乃爾耶至伊等本日奏到各摺並非緊要機宜而用六百里馳遞亦屬不知事體阿桂彰寶種種不合均著傳旨申飭仍將近日緬夷情形及伊等如何辦理之處卽行詳悉覆奏○甲子諭鄉試考差不必分別等第止進呈擬取卷引見候用○丁卯召佛德來京降歐陽永綺爲江西按察使仍帶革職留任調閔鶚元爲廣東布政使以富尼漢爲湖北布政使

原任河南巡撫

○庚午

上詣

黑龍潭祈雨○辛未四川總督阿爾泰等奏小金川土司澤旺攻掠沃克什土司色達克拉寨落牲畜查係色達克拉呪詛起釁澤旺患病其子僧格桑擅自發兵嚴詰僧格桑據稱往搶呪經被沃克什傷損多人番人向例賠償求將沃克什三寨准小金川耕獲作抵仍俟澤旺病愈妥商稟覆報聞○甲戌諭軍機大臣等戶部

議駁彭寶奏請停止各省採買滇銅及令各委員暫行回任一摺
所議甚是已依議行矣各省鼓鑄原爲搭放兵餉之用邇年錢價
平減實由官錢廣鑄流通所有採辦滇銅省分相沿已久豈得遽
行停止致使供鑄無資而委員等在滇守候多時一旦令其素手
而歸不特往返徒滋耗費且使市僧奸商聞知此信以爲滇銅缺
少勢必藉口居奇頓昂錢價於錢法甚有關係况滇省前此多開
子廠頗有成效自封禁後遂致獲銅無多今彭寶既請添開子廠
新廠則將來採銅自必日增何轉至虞其不足卽就見在情形而
計亦當如部臣通盤籌畫何得僅爲滇省認認過慮而置各省鼓
鑄於不問豈封疆大臣爲國實心經畫之道至滇省銅局本係巡
撫專責明德起身時曾面諭其實力整理且該撫見回雲南省城
自當就近妥辦酌定章程彭寶因係總督兼轄籌及地方要務原

爲分所應爲但見駐永昌於銅廠未能親歷卽有酌辦事宜亦當與明德札商會奏或彼此所見不合並不妨於摺內聲明乃不令明德與聞所奏又不協事理殊不可解彰寶平時尙屬曉事何以近日頓不如前卽如詢問哈國興去冬在老官屯傳述緬匪語言有無粉飾及緬匪索取土司彼時如何答覆等情節並非難辦之事乃自奏聞緬匪差人遞書摺後幾及二十日總未提及一字實不解是何意見直至四月二十七日始據將詢問哈國興之處覆奏已屬遲緩且摺內所稱接到哈國興回信日期係三月二十八日乃又遲半月始行入告而奏函僅用四百里遞發全不知事理輕重且所給老官屯頭目檄藁又不嚴正飭責顯有畏縮之意是彰寶竟已另換肺腸實可駭異已於摺內嚴切批飭看來緬匪種種狡詐甚爲可惡迹其索取土司一節已露不復畏懼內地情形

而彰寶情然不以爲意不知邊夷性情狡猾一切機宜皆當隨時酌量若該督將伊等舉動消息纖悉必以上聞朕尙可遙爲籌度今彰寶如此居心竟漸染外省虛偽惡習將來匪眾設有蠢動必將匿不上聞而又不能示以創懲復致如前此之養癰貽患浸漸蠶食土司侵擾內地皆所不免或竟闖入騰越永昌地面尙復成何事體彰寶彼時豈尙能掩諱乎且楊應琚等覆轍具在恐彰寶不能當此重戾實爲彼慮之彰寶著傳旨嚴行申飭又此等關繫邊情事件阿桂見在留駐滇省理應時刻留心今彰寶既將檄文棄札商阿桂阿桂自當協同妥酌不應僅以柔輒言詞率爲諭覆且應籌及緬匪敢向內地索人其狂悖端倪已露當思所以謀防之道詳悉奏聞卽彰寶所詢哈國興之語是否伊去歲在彼目擊情形亦當據實具奏乃竟置若罔聞旣不會銜又不專奏是誠何

心阿桂在滇遇有地方公務如銅斤等項自不便越俎干與至邊境事宜本其專責卽以軍機大臣而論亦分當與聞况伊見帶副將軍印更屬無可推諉設或緬匪有滋擾邊境之事應就近調兵者尙當與彰寶同辦乃竟以有關邊夷要務視爲彰寶獨肩之事不復過問並不發一奏函殊非朕留彼在滇協籌妥辦之意豈竟安坐省城靜候緬匪回文遂爲畢事回京可乎阿桂大不是太無良心矣著傳旨申飭並著明白回奏○彰寶奏老官屯緬目布拉諾爾塔稟懇放還木邦蠻蕃各土司臣飛札詢問哈國興曾否許給據哈國興覆到上年緬酋乞降時送字往諭各頭目稟稱木邦蠻蕃土司隔遠不敢求還惟求將猛拱土司賞給彼時同各領隊大臣並無賞還土司之語臣卽與阿桂酌寫檄文飭駛送往老官屯檄稟恭呈 御覽得旨如此要務所奏甚遲係屬何心且檄文

亦不嚴正明係爾畏緬矣若再加以諱飾將來成何事體前轍具在朕甚爲爾憂之此事以四百里馳奏而不中理之銅務反以五百里是何緣故豈爾更換肺腸耶○乙亥諭考試天津接駕之休致翰林鄭岱鍾等以檢討主事知縣驍騎校分別錄用

五月丁丑朔日有食之○庚辰以劉秉恬爲左副都御史

由鴻臚寺少卿

○壬午諭八阿哥未行奏聞輒自進城觀保湯先甲係阿哥師傅並未勸阻殊屬不合觀保湯先甲俱著革職○癸未諭阿哥等在書房讀書所以檢束身心自當出入有常跬步必謹如每月派祭 奉先殿等事原可循例徑行其餘或有他故外出必須以實奏聞庶舉動不得自由且有合於出告之禮今八阿哥以己事入城並未奏知又不關白師傅殊屬非理且皇子每出例派散秩大臣侍衛等護行非惟體制宜然亦所以致其防閑使不得行止任

情趨於所便也乃入阿哥僅帶親隨及園門護軍數人策騎同往有何急務而慮遽若此縱不自重其如大體何率此以往或相習效尤無所顧忌必將肆意游行無所不至且恐外閒愚妄之徒得以藉端詭遇馴至結納依附諸弊皆從此隱伏其所關繫尤鉅不可不爲先事之防况阿哥等漸皆長成尤宜慎於所習卽在書房原非專事儒生佔畢惟當循循規矩使心志不至外馳且弟兄輩昕夕相聚砥礪交資盡化其畛域忮忌之見亦甚有益其阿哥等之未習職事者固當以就學爲先務卽如四阿哥派管武英殿等處六阿哥派管內務府縣恩阿哥派管前鋒統領遇有應行事宜及有與同事大臣商酌者自不妨各就官所辦公其無事之時仍當日理常課卽文書畫諾亦可攜至齋中正復並行不悖其他更不容稍有曠廢矣至於入阿哥進城之事朕初亦竟不知因近日

派諸皇子詣 黑龍潭分班祈雨八阿哥與十一阿哥同班適伊
二人下班之期朕遣人喚至傳旨詢及雨壇事惟十一阿哥對答
始知八阿哥之私自入城朕並非有意覘察而其蹟自然發露得
以因事提撕小懲大誡未必非諸皇子之福在八阿哥惟當益深
感懼卽眾阿哥亦當共知奮勉方不負朕教育成全恩意若八阿
哥謂十一阿哥訐發其私隱懷嗔恨此乃不明理之見諒亦不出
此試思十一阿哥當朕問及時設稍爲其兄掩飾彌縫豈非欺父
若喚來面詢何能復隱且朕非特慈愛諸皇子爲之杜漸防微實
敬念我 祖宗貽澤之長惟期世世子孫永守無斁因不惜諄諄
教迪諸皇子宜善體朕心恪遵朕訓志日篤而業日修復彼此相
親相愛式好無尤方能永承福慶至師傅爲皇子授讀豈僅以尋
章摘句爲能竟不知隨事規勸俾明大義而總師傅則尤當盡心

誨導凡事納之於善勿使稍有過愆方爲無忝厥職今於八阿哥
擅自出入一節漫無覺察所司何事且朕昨歲卽聞書房中諸務
懈弛乃總師傅從無人奏及一語此非漠不關心卽係務爲姑息
以致阿哥等不復畏憚釀成此事所謂愛之適以害之又豈朕委
任老成本意乎若諸達等之不曉事理自取咎戾更不足責備矣
今已將八阿哥及師傅諸達分別示儆並爲明切誡諭令錄一通
實貼上書房使皇子等朝夕觀省知所勸戒○諭永貴自署理伊
犁將軍以來並未實心任事所辦哈薩克馬匹一案伊明知巴爾
品被人蒙蔽乃隱忍不奏經朕降旨詢問始行奏聞又涼州莊浪
兵丁應賠倒馬銀兩將並無干涉之熱河官兵俸餉一併扣存亦
未據聲明具奏是以令伊來京自應卽予革職但永貴平日尙屬
謹慎不至竟當廢棄永貴著加恩補授都察院左都御史革職留

任效力行走不准戴用翎頂○諭軍機大臣等據阿桂彰寶奏都司蘇爾相齋送檄諭至老官屯該處緬目諾爾塔堅留該都司在彼住歇五六日等候阿瓦回信等語並將諾爾塔緬字原稟譯出漢字呈覽所辦殊未妥協伊等既派該都司前往老官屯齎交檄文卽應將如何告諭諾爾塔之語豫爲指示使蘇爾相不致措詞失體任彼款留方爲得要乃伊等計不及此僅將檄文交給遞送遂爲了事已屬非是至諾爾塔所遞緬字來稟自應一併進呈乃僅將譯出漢字進呈稱其詞語恭順殊不可信必係阿桂彰寶因其蒲葉原書別有肆慢之語故隱匿不敢上呈可見伊等意存粉飾惟圖遷就完局率此以往則一切邊防事宜皆任意裝點又將何所不至阿桂等尙得謂具有天良乎至阿桂原因邊務未竣留其同彰寶商辦何以竟不前往永昌就近面籌乃安坐省城惟恃

文移往來商覆其意何居阿桂彭寶俱著明白回奏仍將繕字原稟呈覽○戊子諭據佛德回奏王鴻與揆義黃肇隆因借銀不遂挾有嫌隙情節既有見聞未行具奏請旨嚴加治罪一摺佛德身任臬司原有奏事之責不但王鴻與揆義等索借挾嫌情節明知其事並不奏聞卽從前揆義與黃肇隆交結違迎款蹟纍纍事關本省官方不飭司臬者豈得視同膜外竟爾諱匿不奏是其取悅同官袒庇劣員取咎益難自解佛德著交部嚴加議處○己丑以湖南輪免錢糧並免乾州等三廳城步等二縣苗糧○辛卯諭本日吏部奏請引見十年俸滿之武清縣知縣甄克允係因親老改補近省之員據咨列入引見殊屬非是已令該部將該員扣除矣此等改補近省人員定例在任停其升轉因該員日後尙應坐補原掣遠缺所以杜其擇缺規避也若因十年俸滿遠行准其引見

設令得隨久任人員量加升用是該員竟得藉此超擢轉滋僥倖之階於例意實屬未協嗣後凡有改補近省人員不得援引十年俸滿之例帶領引見著爲令○乙未以祈雨命刑部清理庶獄減軍流以下罪○戊戌諭前因吉林將軍傅良具奏佐領額爾圖等拏獲創獲人犯受賄私放一案並不分別首從遽將額爾圖等擬以立決絞候二十餘人經刑部議奏朕覈其情節辦理原屬過當是以降旨令其解送來京交該部另行審訊並卽罷傅良將軍之任令來京候旨今據刑部定擬具奏則竟將各犯槩擬發遣枷杖完結是非矯枉過直有意市惠沽名全不顧情罪之輕重辦理甚屬錯謬且如案內佐領額爾圖身爲職官敢於得受人賄三兩六錢故縱私獲案犯自應按律問擬以昭炯戒乃該部止議以枷號完日發往伊犁當差夫官兵發往伊犁不過三五年無過卽可

歸本處此與無罪何異經朕面加詰訊而裴曰修輒以計賊論罪未及八十兩爲對試問該犯得受人獲三兩六錢計其所值應得若干此亦盡人可知者而猶以爲未及滿貫欲以此售其嘗試使兩將視朕爲何如主耶朕臨御三十五年事無鉅細無不準情酌理而於辦理庶獄輕重銖兩務協其平從無絲毫成見卽如本日軍機大臣等會議軍營馬匹分別賠銷一摺朕以緬地水土惡劣雨多路滯馬驟易致受傷非官兵等不善飼牧及別有憐弊之所致是以格外加恩槩免賠補雖數至累萬無可靳惜若此衆之意存寬縱該堂官自以養奸爲積德而於憲典輕重所關竟槩置之不問朕若不明斥其非將亦聽其廢法可乎朕綜理庶政一秉至公一切惟視事理爲權衡並不稍設成心此實可對天下臣民者卽以今日所辦二事言之朕何嘗有從寬從嚴之見存於意中乎

著將此通諭中外使揣摩者知所愧而嘗試者益知所懼所有刑部堂官著該部嚴察議奏○諭辦理緬匪一事原出於不得已屢降諭旨甚明及去冬官兵攻圍老官屯因所經之地水土惡劣軍中多有病者勢不可以久留即使攻破其砦亦難長驅深入因念我八旗勁旅不用之於戰陣而以嘗試毒癘之鄉於事體實爲不值且旣已收服猛拱猛養而新街一戰又已大挫其鋒足示懲創是以降旨撤兵彼時並不知緬匪有乞降之事亦不知經略大學士傅恆之在營染病也乃朕旨未到軍營而緬匪適自阿瓦遣人至老官屯同該頭目諾爾塔詣軍門懇請罷兵其意實因甫經挫衄怵我兵威於理自應聽許但傅恆身抱沈疴勢難於自主而阿桂身任副將軍凡軍營要務經略而下卽應身肩其責自當先送傅恆入關調理而阿桂留駐彼處整飭部伍或五日或十日漸

次徐徐退兵庶緬匪不能窺見淺深妄生輕視耳乃阿桂一得緬
匪投誠之信如獲更生卽將諸路攻圍之兵同時俱撤卽日慮忙
而歸致緬匪知我兵利於速退得以料我虛實遂生慢易之心及
渾覺遣歸彼益得深悉營中底裏豈復有所忌憚在渾覺之不應
遽遣朕固不能爲傳恆諱卽傳恆回見朕時亦自知病中辦理之
失至亟亟撤兵一節則其咎全在阿桂阿桂受朕厚恩委以軍務
重寄竟全不以國事爲念惟圖自了可謂毫無良心實爲可恨朕
於大臣功罪一秉大公絲毫無所偏倚如傳恆之爲國出力不避
艱險雖嬰疾而勤瘁不懈豈能復加之責備况傳恆在彼病勢甚
重幸得力疾歸程可就調攝完此用兵大局設留滯老官屯或有
意外不虞其於國體所關甚大此皆 上天嘉佑朕實深爲欽感
若阿桂之始終不肯出力節貽誤豈能稍爲寬貸乎至於緬匪

情願納款一節傳恆奏到時朕因先有撤兵之旨亦遂就事完事
原難必其果能遵受教約如期入貢及送還內地之人曾向軍機
處屢次諭及而眾人多信緬匪爲實以爲必來並無稍有遠見者
及數月後緬匪尙無消息朕因思緬酋狡惡非常貢表之有無遲
速固不足計而所許送還內地之人經久不遣必係賊人見我退
兵急遽情形心無所畏方悔其前此求降之舉豈肯復卽爲送還
或並向我索還彼處投歸之人俱未可定因卽命軍機大臣代擬
檄諭緬匪文稟催索應還之人乃朕旨未到而諾爾塔竟致書將
軍等索取木邦蠻蕃猛拱三土司是我所發檄文轉落其後朕方
惜籌畫稍遲而阿桂彰寶及在此之軍機大臣竟無一人能見及
先幾者朕實惡之今日阿桂回奏之摺尙稱就見在情事而論若
緬夷敢於侵擾邊境以爲必無其事等語是誠何心試思緬匪若

果懾我聲勢豈有不卽遵去冬教約送還內地之人且前說旣已付之不理而諾爾塔何物輒敢向將軍等索取土司揆其心迹又豈尙得謂之稍有畏懼乎彼旣輕忽將軍總督之漫無措置卽將來侵擾邊境勢所不免阿桂猶以爲可保無事果何所見而云然朕並非願緬夷之不靖欲復事征勦爲此幸災樂禍之語而審勢度理實不得不爲此慮阿桂非糊塗不曉事之人豈竟全不見及揣其意不過恃有巧言令色之技工於掩飾卽緬匪有侵擾之事必與彰寶匿不上聞然充其伎倆亦止蒙蔽一時萬一養癰貽患侵及內地豈能終於掩諱在伊等身獲重譴固其自取然至其時卽將伊等立寘重典於國事復有何裨乎又今日召見劉秉恬博清額詢以軍營諸事據稱上年攻圍老官屯時緬子差頭目懇求解圍並請給與回字其時經略傅恆病勢雖重總欲攻克賊砦盡

力追勦不肯允其所請而副將軍阿桂以氣候惡劣人多疾病勢難再進不如就緬子見在懇求允其撤兵給與回字經略終不以爲然阿桂又帶領各領隊大臣提督總兵等來稱見在光景實以就勢撤兵爲是並各出具甘結經略心中甚憤卽欲將眾人參奏因病中精神恍惚未經辦及其結見存博清額處等語其事尤可駭異阿桂與傅恆事同一體阿桂如因經略有病勢難再留自應將軍中實在情形詳晰具奏候朕裁奪何至轉率領隊大臣等懇求傅恆撤兵出具甘結計圖遷就了事實不知其是何肺腸朕非不欲息事甯人豈肯如無識者流爲苟安姑息之見因召大學士尙書同軍機大臣等將阿桂前後種種錯謬情節明白宣示爾等以爲阿桂所行之事尙在情理之內乎將此通諭中外並令阿桂明白回奏○諭軍機大臣等今日阿桂回奏之摺甚屬荒唐已明

降諭旨宣示矣阿桂之意竟欲治去彰寶自爲雲貴總督此等伎倆豈能在朕前巧爲嘗試在彰寶近日辦事實遠不如前且滇督見辦邊情任大責重原亦不免竭蹶至阿桂不過小有聰明豈果必勝於彰寶遠能勝任愉快且朕何如主又豈肯受其愚弄輕爲更置耶又伊等附奏所付諾爾塔檄票內有據情入奏蒙大皇帝如天好生之恩俯允所請降旨班師之語尤爲憤憤上年緬匪遣人至軍營投降甫允其請卽行撤兵相距不過數日緬匪豈不知京師去滇萬里卽欲轉奏而驛傳往來動需經月焉有不逾信宿遂有允准班師之旨其中失枝脫節徒然示之以弱適爲緬匪所嗤笑阿桂等豈竟未之思者而甘於自欺欺人乎其餘檄內措詞又並無一嚴厲之語惟事婉言遷就又何必多此一舉且蘇爾相爲諾爾塔所留今又遣鮮玉前往設彼處並留此人尙成何事體

乎阿桂彭寶種種錯謬屢經嚴飭總不知稍有悔悟率是以往尙
安望其實心籌畫有裨邊事言之不勝憤懣阿桂彭寶著再傳旨
嚴切申飭○命山東購運麥石交五城平糶○己亥諭今日刑部
改擬拏獲創獲人犯受賄私縱一案將額爾圖孟忒二犯擬絞請
卽正法所辦又屬過當此案前因該將軍傅良定罪過嚴漫無區
別是以降旨交刑部另辦乃該堂官意存寬縱槩以發遣枷杖完
結經朕面加訓飭令其按律改正今又於定律絞候之外加以立
決則所謂過猶不及均非情理之平也額爾圖身爲佐領與驍騎
校孟忒皆係職官旣查獲偷獲人犯卽應解送究治乃敢受賄故
縱實屬藐法營私其罪在此並不當與在官人役因事受財者僅
從計贓科罪也但額爾圖等雖實犯死罪卽計贓浮於滿貫究與
婪索數逾千萬者不同止應入於秋審情實而亟亟於決不待時

又豈得爲情罪允協耶論辦理案情錯謬乃該堂官所同昨面諭時並非專於襄曰修加之詰責特以襄曰修平日爲人原有辦事之才而覈其局量規模頗似舒赫德而小在朕前駕馭器使尙可節取所長若令其獨當重任卽不免自恃聰明難於深信卽如從前派伊同舒赫德往福建審事甫經到閩略一查訊卽奏聞摘取巡撫定長印信襄曰修遽行署理其迹已難自掩然非獨襄曰修覬覦撫篆卽舒赫德之意亦未嘗不隱圖總督一席而代之試思封疆大臣皆經朕慎擇委畀豈能聽人妄生冀倖况欽差查辦督撫一經去官卽令欽差坐補其缺又復成何體制朕何如主豈肯任其售此伎倆耶之二人之見薄於朕早已在此矣又昨阿桂覆奏摺內詞意之閒竟欲治去彰寶自代其任經朕嚴切批飭阿桂之爲人亦舒赫德之流亞朕素所洞悉彰寶近日辦事雖漸不如

前卽將來或須更易亦必另簡堪以勝任大員豈有意授阿桂之
理用人大柄朕自操之豈臣下所可想望而得者朕接見廷臣情
誼聯袂未嘗不視同家人父子但察其人語言心術今日果屬奉
公自當加之以雨露明日或涉私意亦必震之以雷霆一切皆其
所自取而朕無所容心於其閒亦不能稍存遷就調停也卽此番
明切訓諭尙欲冀伊等痛自湔滌無負朕諄切造就之恩不獨褒
曰修等當知所愧悔卽諸臣亦當共知儆惕將此通諭知之○庚
子諭軍機大臣等據彰寶奏外委鍾朝相回關帶有諾爾塔回文
狂吠可恨等語彰寶此時始知不出朕所料又復何益此事皆係
阿桂所誤去冬在老官屯緬酋差人懇請解圍彼時大學士傅恆
病勢甚重精神恍惚豈能復爲計畫阿桂身爲副將軍自應將傅
恆先送進關調理彼仍整兵駐老官屯以觀動靜或五日或十日

徐徐撤退庶賊人不能知我淺深乃一聞賊匪納款之信如獲更生各路官兵同時俱撤賊眾窺見我兵利於速退回軍狼狽之狀致賊心生輕慢而遣回渾覺尤爲失算渾覺與我兵同行日久軍中一切虛實皆所熟悉雖云邊外野夷知識淺陋其耳目所及豈能瞞彼安得云彼竟無知阿桂在彼何以全不計及率行遣歸渾覺旣去豈有不將我軍營情事盡告賊酋自圖免禍之理賊眾聞知尙復何所畏懼有不悔其前此投誠之說乎朕籌慮緬事之必不妥順實在我兵輕撤及遣回渾覺之時不待今日始知其反覆也至彰寶請卽時進兵之說實屬大謬去年厚集兵力所用皆八旗勁旅奮勇直前雖有新街一捷而水土惡劣尙且不能成大功今瘴癘方盛所留不過雲貴兵萬餘勢不及上年百分之一輕率前進徒令士卒損傷於事毫無裨益卽此可見彰寶之不知事體

但窺其意亦不過以身任總督姑爲此語自存地步原非出於誠心大臣爲國家籌辦邊情自當策及萬全何得以此必不可行之事巧爲塞責乎此時自宜處以鎮靜嚴飭邊守以防賊匪之潛謀侵軼或俟冬閒瘴退時選派精銳二三千人統以勇敢將領乘其不備襲擊而進掩殺賊眾以申我威棱雖於事無甚大益亦庶幾稍紓憤懣耳至摺內所稱將千總解玉追回所見亦是但蘇爾相爲彼拘留尤難置之不問自應再發檄諭嚴飭諾爾塔向其索還已命軍機大臣代擬檄藁寄到後可卽令通習緬文之人繹出緬字同漢字一併繕寫如式發往卽遣此番送信之外委鍾朝相齎去並令其面諭蘇爾相云爾身爲都司帶有兵丁同行豈無藏有防身器械前日諾爾塔請爾進城逼爾接阿瓦來信爾卽當同眾兵捨死併命殺傷彼眾卽不然亦當挺身罵賊何竟束手無策聽

其拘絆卽此已爲武職大員之玷使彼時卽爲賊目所害爾子孫亦必蒙優卹乃竟甘心隱忍爲此詰責時當令諾爾塔聞知並不妨告以爾卽將我陷害我亦無所畏怯我子孫亦必蒙大皇帝加恩等語使微外賊目知天朝兵弁仗節不屈庶足以折其心不得復如蘇爾相之默默無能也阿桂此時自己前赴永昌惟當與彰寶同心協力妥籌一切不得稍存畛域自速重戾總之此事貽誤實由阿桂將來如自知悔悟竭誠奮勉尙可稍贖前愆若竟下愚不移自問當得何罪乎至哈國興於老官屯接見緬匪傳述言詞其中自不無粉飾去歲傳恆病中或亦爲其所蒙今伊將次到京經朕面詢自難逃朕洞鑒但此時因諾爾塔向蘇爾相索取土司輒謂粉飾顯然亦不足以服其心已於摺內批諭並將此詳悉傳諭阿桂彰寶知之至緬匪近日情形若何及此次檄諭後如何回

覆務卽速據實奏聞外寄軍機大臣代擬檄諭一道檄諭老官屯頭目諾爾塔知悉上年官兵攻圍老官屯時爾阿瓦王子差人至爾寨中同爾詣軍門齎書懇求解圍情願奉表納款送還內地之人彼時本將軍等鑒爾王子情詞恭順遂與爾立定教約給爾回書撤兵停勦乃遲至數月杳無信息本將軍等以爾投誠之語曾經代爾奏聞大皇帝爾等卽敢於欺誑本將軍等如何敢於

大皇帝前蹈欺罔之咎因檄示爾王子索取被留之人此爾王子並遣爾諾爾塔等向我軍營懇求之事何竟敢行反悔今爾王子並無回信爾諾爾塔何物輒敢向我索還土司並拘留我送書之蘇爾相且敢投書與本將軍肆行狂吠實爲覆載所不容矣蘇爾相一微末武弁汝卽留被害彼於天朝毫無所損正恐爾負此重罪莫可逃誅且爾緬國生靈又將塗炭矣爾自思爾一蟲蟻不如之

人輒敢違爾王子去年納款書詞向本將軍等抗詞蔑禮爾尙可比於人類乎本將軍總督奉命鎮守邊境視爾窮荒匪目何等之屬豈容爾妄自尊大出言無狀乎亦豈容爾以爾王子願受約束之語擅自反覆乎爲此再檄諭爾諾爾塔卽將我所遣都司蘇爾相如禮護送入關並卽寄信爾王子將從前所留之人速卽查明送還以全爾王子之禮信毋稍執迷不悟自貽後悔禍福惟爾自取慎之懷之特檄○辛丑諭朕授阿桂爲副將軍伊當感激深恩竭誠辦事經略傳恆患病阿桂尤宜於一切事宜奮勉措置乃阿桂自赴雲南以來並未實心辦理而撤兵時傳恆病重阿桂並不將所撤之兵按其營隊約束整齊緩緩行走惟期市惠於眾愚遽撤回甚屬非是實負朕恩除令阿桂明白回奏另降諭旨外所有阿桂之子三等侍衛阿迪斯藍翎侍衛阿彌達俱著革退○諭軍

機大臣等昨歲征勦緬匪選派八旗勁旅厚集深入乃其地水土惡劣官兵在彼多染疾病難以久留因傳諭撤兵旨未到而緬酋適已差人詣軍營投誠亦遂就事完事原不必緬匪之果奉表納貢也但彼既稟受教約其被留之人自應卽行送還因其日久不至恐賊匪見我去冬退兵急遽明示之弱而渾覺遣歸斷不能不洩我軍中虛實未必不心生反悔曾諭阿桂彭寶檄諭緬酋催其速行送還被留之人乃老官屯頭目諾爾塔於未奉檄諭之前輒敢致書將軍等索取木邦蠻蕃各土司且將我齋檄之都司拘留在彼而所遞書詞肆行狂吠其反覆已屬顯然窺其意不過自恃險遠且深知我軍行拮据欲以此激我用兵而彼得以逸待勞坐乘便利自不可墮其術中且師出無名亦不值復有徵調此時且宜處以鎮靜惟嚴飭邊防無稍疏懈或於冬閒瘴退時就雲貴兵

丁中選派精銳前往襲擊掩殺稍可振我軍威但彼處綠營將弁率係懦怯無能不足勝帶兵之任見在選派侍衛等前往滇省以備巡邊及統兵之用俱隨時陸續起程著各該督撫於伊等經過各省時止須按尋常出差之例不動聲色由驛應付不必照上年官兵經行大爲豫備至見在緬事未竣滇省文報往來尙關緊要並著各督撫轉飭各驛站照前上緊遞送毋稍遲誤其原派稽查驛站各大員並留心妥協查覈毋涉張皇將此密諭各督撫知之○癸卯諭軍機大臣等吳達善等及宮兆麟奏古州黨堆寨苗人聚眾不法拒傷兵役卽前往該處相機剿捕等語所辦尙爲迅速此等匪苗滋事自應卽時擒捕立賞重典以示懲儆今宮兆麟一聞稟報卽親往該處協同該鎮緝拏吳達善等亦已同往會商妥辦自能措置頑苗敢於抗拒其罪自不容誅但野性獷愚易生驚

畏若辦理稍有不善致各寨聞風勾結合力救死其勢轉難解散此時止宜就黨堆一寨糾眾傷人各犯嚴行拏獲立賞重典以儆其餘設敢負固不服不妨卽爲剿洗此外各寨宜曉諭撫輯俾知官法所及止頑梗生事之徒其守分良苗槩不株累以安其心自皆懷德畏威不敢輕動卽聞有一二附近黨堆無知苗眾隨聲逐隊原可無庸徹底根求正合脅從罔治之道非若內地民人糾眾附和之案必當窮其黨羽毋任漏網也吳達善等平日尙屬曉事自當就該處實在情形妥協籌辦一切機宜皆須隨時措置朕亦難爲懸定指示總之辦理此事有應擒捕者速宜就獲毋稍稽延有應撫諭者處以鎮靜毋使疑駭設或苗眾竟敢自作不靖彼此勾連漸成事端則又當用兵剿蕩勿稍姑息不得因有此言妄生揣度遂思化大爲小化有爲無遷就完事也至啓釁之由盡歸罪

於龔學海亦未必然總由良卿數年來吏治廢弛敗壞已極如順安刁民控告桐梓奸徒聚眾之案不一而足良卿實死有餘辜但龔學海辦理不善之處俟本案辦完亦當查究看來龔學海係尙氣好事不知大體之人卽如丹江兵米一案不稟上司遽揭部科其心已可槩見總因降官之後急欲有以自見龔圖復用龔學海過於求細滋費之語係魏涵暉在省據伊子魏傳曾所稟其言自出於公論非由同官等之事後諉過也但龔學海係魏涵暉正屬平日見其舉動卽應早爲提策或申報上司乃竟聽其任意妄行是魏涵暉之不能駕馭屬僚亦難辭咎並著於結案後查明參奏至見在辦理情形若何仍卽速行奏聞將此傳諭吳達善等並宮兆麟知之○乙巳諭葉相德前在福建將備任內擒拏匪犯蔡榮祖一案頗爲勇往奮勉是以加恩錄用不數年間擢至提督昨歲

派令帶領舟師赴滇協剿冀能感激竭誠策勵弁兵力圖報效嗣聞其在軍營病故特予恩賚優卹原念伊爲國宣勞雖非臨陣捐軀亦當厚其飾終之典俾眾人共知激勸也及軍營侍衛等回京詢悉閩省水師兵丁進征時種種恒怯無能甚至一聞槍礮輒行股慄竄伏該提督職司統領目擊眾兵如此不堪竟不知董導約束申嚴紀律以儆其餘是其器滿自盈不改緣營惡習惟事逐隊隨行全未實心出力大學士傅恆回京亦奏其若在必當參處軍行賞罰務期覈實使葉相德尙在且當重治其罪豈宜復令濫邀優典所有葉相德病故以後一切加恩議卹之處著槩行追還不必給予

閏五月丙午朔命羣臣修赴薊州寶坻一帶捕蝗○戊申京師大雨○諭喀甯阿自擢用巡撫以來辦事時形竭蹶竟係一無能爲

之人因照部議革任但竟予罷斥轉得遂其安閒伊曾任刑部司員於刑名尙爲熟習著加恩以刑部員外郎用帶革職留任其刑部侍郎員缺著邁拉遜補授仍兼總管內務府大臣事務○己酉以柏琨爲內閣學士○辛亥諭軍機大臣等吳達善等奏查辦逆苗情形一摺所稱曉諭各寨苗人不使疑懼之處頗爲得要至黨堆匪苗香要實爲此案渠魁必須擒捕就獲立置重典以示儆戒見在竄入生苗地界尤不可聽其匿迹遠颺昨據陳輝祖奏到廣西連界苗寨處所已令地方官宣諭就近苗寨協力堵禦如匪苗逃至其地卽令擒獻自可不慮其他逸今吳達善等差萬忠由閒道往住居塞諭令縛獻首黨各犯程國相柴榮春亦統兵合剿斷其後路自應剋日就擒但程國相節次所辦剿捕之事並無實濟如攻打烏牛等四寨未聞斬獲一人所燒僅係空寨不能使之畏

懾且苗民搭蓋山寨非其所難今聞官兵一到卽紛紛竄匿及官兵退後難保其不仍回巢穴結寨安居是彼視進剿可以趨避倖免勢且心生輕忽何以懲戒將來總之辦理此事其隨聲附和者自當用脅從罔治之例其倡惡首犯斷不可聽其漏網必須上緊擒捕速完此案切不可徒以焚燒苗寨收獲器械遂爲了事也程國相辦理旣多未協卽帶兵前往恐難深恃吳達善等既在下江部署悉其情事何以僅令該護鎮往捕竟不勒兵續進親爲督促豈以駐紮調度遂畢乃事乎至此事初次奏到尙以或係襲學海激成及閱續奏歐韻清供稱黨堆匪苗有擅自稱王之事往報該同知因差土舍等往彼查辦是其分所應爲並非喜事今據所獲之老兩等供稱黨堆寨苗首要揚言脅眾向其磕頭不從者卽行殺害等語黨堆各寨皆係歸化熟苗乃敢如此妄作不靖豈可不

行懲治是龔學海之遺士弁查訪竟屬實心任事不得轉加之責
備而魏涵暉庸碌無能平時既漫無整飭且必時有嫉怨龔學海
之言伊子習聞遂有初次之稟此案之過實在魏涵暉而不在龔
學海朕於臣工功罪惟視其人之自取從不肯存成見亦不容其
稍有諉卸蒙蔽著吳達善等於結案後秉公查明據實具奏將此
詳諭知之○命截留漕糧二十萬石於天津北倉備用○甲寅諭
軍機大臣等見在軍機處行走之滿洲大臣人少因思溫福前在
軍機章京上行走有年尙爲熟練曉事著傳諭溫福奉到諭旨卽
馳驛速行來京所有巡撫印務交崔應階暫行兼管其員缺候朕
另行簡放至崔應階前據奏於四月二十六日由延平邵武汀州
及浙省之溫處甯紹等府巡視至杭計崔應階此時自已至浙境
奉到此旨後卽速起程回閩沿途迎見溫福接署撫篆仍回福建

省城兼署將此並諭崔應階知之○丙辰諭今日各部旗大臣等具奏以本年爲朕六旬慶辰請於御園豫備稱祝所奏不必行園中地本不寬勢難令文武大員聯班並列且越歲辛卯卽恭逢聖母皇太后八旬萬壽普天慶洽朕將躬率臣工舞綵臚歡用以敬迓 慈禧宏敷慶典九卿等屆期自可共抒忭蹈之誠若因朕躬誕辰頻年稱祝爲此無益之舉實非朕所樂從昨歲恐中外臣民因朕週甲聖節籲請建設經壇延釐祝嘏徒致耗糜物力已明降諭旨豫爲飭禁今復思大臣中有因萬壽備物進獻者伊等身膺顯秩藉此以申忱悃原非過分但亦當予以限制如內而大學士尙書都統外而總督巡撫尙可允其奏進其在京侍郎副都統以下並外省提鎮學政藩臬等人數旣繁若紛紛呈進在諸臣旣從事分心購辦進覽時朕又增檢閱之煩甚無謂也所有伊等豫

備之處驟不必行並敕奏事處毋許傳進朕臨御三十五年以來夙夜孜孜圖治惟期推仁究澤嘉惠元元於以仰紹列祖貽庥祗膺昊蒼鴻眷其所厚期於諸臣者惟能以朕心爲心以國事爲事愛養黎庶整飭官方行之以實心實力使綱紀愈以肅清海宇益臻康阜其視崇尚繁文縟節冀爲朕躬稱慶實爲遠勝况將來由七旬八旬而上晉袞益高原可俯順羣情俾抒誠懇正無藉此時之喁喁叩請爲也用是明切宣諭知之○己未諭褒曰修等奏在永定河武清東安連界撲捕蝻孽忽見飛蝗南來漸往西北周元理卽帶領員役追視其所落之處撲打自應如此辦理至摺內又稱寶光縣帶同都司糜大禮前往迤南一帶照飛來方向尋覓所辦甚屬錯謬寶光縣爲人拘鈍無能自顧尙且不暇焉能徹底根查得其實情褒曰修平日尙屬曉事如卽親往查勘當不至

爲人蒙蔽今既目擊情形自應迅速赴蝗起處所查明貽誤之地
方官參奏治罪而留寶光鼐在彼督捕方合事理乃竟安坐武清
等處僅聽寶光鼐前往一查塞責全不知實心任事已屬非是至
摺內稱將來或於隱僻無人之河淀等處查得一語尤爲取巧其
意不過以隱僻河淀尋覓難於周到隱爲玩誤劣員豫留地步此
等伎倆豈能於朕前嘗試褻曰修著交部嚴加議處仍著卽往迪
南一帶切實根究儻於起蝗處所之諱匿不報州縣復爲徇庇開
脫褻曰修能任其咎乎○諭溫福著來京補授吏部侍郎在軍機
處行走其福建巡撫員缺卽著鍾音署理○甲子諭褻曰修見已
交部嚴加議處著解任候旨刑部尙書員缺著程景伊調補工部
尙書員缺著范時綬補授左都御史員缺著張若淮補授其工部
侍郎著閻循琦署理○吏部等部議准四川總督阿爾泰奏綿州

爲涪水衝卸無地遷建應裁附近之羅江縣令綿州移駐原駐豐
谷井州判移駐該州舊治從之○四川總督阿爾泰奏小金川僧
格桑與沃克什土司彼此相攻委員查勘據稟僧格桑託詞觀望
色達克拉請兵攻剿僧格桑復圍其官寨防守官兵進剿各路等
語擬派官弁督各土兵圍攻俟其力盡求免再行請旨臣與提臣
董天弼卽親往查辦得旨所辦尙是汝等旣往情形如何速行具
奏尋奏親往查辦小金川沃克什攻圍一案僧格桑聞知畏懼稟
求撤兵見在圍兵已退而占地未還守兵未撤仍令各土司進攻
示儆已將事宜交副將接辦臣回省辦理審案後再行前往報聞
○乙丑永定河北岸決命德成馳往會同楊廷璋堵築○命於德
勝門外另建滿洲火器營並增設馬額○丁卯諭軍機大臣等今
日周元理會同西甯等奏到搜捕蝗孽一摺業已隨摺批示發回

至摺內列名處西甯達翎阿則稱奴才周元理則稱臣殊覺可笑
臣僕本屬一體均係奉上之稱字義雖殊其理則一滿漢臣工自
稱固有不同然遇部院章奏雖滿漢大員亦一例稱臣而滿洲督
撫奏地方公事亦然並非以奴才之稱爲卑而近稱臣爲尊而遠
也卽如滿洲大學士在朕前亦自稱奴才而漢人雖丞簿末秩引
見亦皆稱臣豈丞簿漢員因此遂得謂尊於滿大學士乎朕撫御
臣民並無歧視而朝廷體統本自尊嚴又豈因臣下之稱奴才而
尊崇有加稱臣而體制有減乎朕於此等事從不計較卽漢人中
間有於召對時稱奴才者亦並無嘉賞之意而摺奏列銜則不宜
參錯止當論首銜何人或滿或漢皆可以一稱貫之此次三人會
奏之摺西甯名列在前旣稱奴才則達翎阿周元理自當連名直
寫又何事妄生區別於其間耶若謂周元理不屑隨西甯同稱有

意立異是視周元理身分太高諒彼亦不敢萌此念但此等節目必拘泥若此又何其不達事理耶可笑之至將此傳諭周元理知

之○戊辰以謝墉爲內閣學士

服閣內閣學士

○壬申諭據楊廷璋查究

飛蝗起處卽係武清東安二縣地面果不出朕所料摺內請將玩視民瘼之知縣甄克允郭麟紱革職拏問該管各員嚴加議處等語已交部嚴察議奏矣該縣等於螭蟬初萌之時並不按尋創捕以致蔓延飛散貽害田禾罪無可追該管上司自有應得處分至霸昌道王錫命係監司董率大員乃一味徂於外吏蒼滑習氣並不實力督辦殊屬有乖職守王錫命卽著革職所遺霸昌道員缺著定敏補授此次飛蝗初起自武清東安之間由南而北旋卽南回散落黃華店一帶其爲卽係該縣等地面所生更無可疑前經裘曰修等初奏時朕早已洞悉及此當卽傳諭令其確切查究此

等蹤迹在寶光縣誠不足以知之至襄曰修豈得亦以不知自諉乃先將河淀隱僻無人一語豫爲地方官開脫地步昨據覆奏果以並無蹤影爲辭其爲心存取巧又安能自行置喙若寶光縣之爲人本係拘鈍無能此次查辦蝗蝻所奏各摺總無一語清楚豈能勝府尹之任寶光縣著以四品小京堂用所遺順天府府尹員缺卽著襄曰修降補其不能嚴督屬員實力搜捕所有應得處分仍著交部嚴加議處○甲戌諭軍機大臣等辦理緬匪一事固出於不得已去歲進兵太早由戔鳩紆路行走人馬受傷於事無濟阿桂在彼年餘地勢事機自無不知傳恆甫經到彼未能深悉伊應勸阻如傳恆不從卽應參奏乃並不披陳所見又不據情具奏但以爲有傳恆在彼一味推諉非有意貽誤國事乎卽以阿桂一路之兵而言伊在蠻瘴時蘇明燦前來告稱賊目諾爾塔賁夜令

伊入壘復乘夜遣出彼時緬匪尙未有備阿桂誠能率師掩襲自可攻克老官屯乃遲疑不進致失事機其後守禦旣嚴水土又甚惡劣徒致弁兵受傷朕洞鑒其情是以諭令撤兵此旨未到之前賊匪被官兵痛剿又復急攻其壘軍威大震當撤兵之際阿桂若揚威振旅使緬匪震懾伊又何敢於乞降之後旋即食言一至於此若謂傳恆有病不便在彼人住宜先將傳恆送回伊統兵在彼多住數日乃於此等處並不留心而與哈國興水乳相投希冀草草了事一似撤兵卽得重生將軍大臣下至兵丁等並無隊伍紛紛而回緬匪始得知我虛實前據伊等將撤兵時二更起程兵丁被人戕殺一事奏到朕卽降旨飭諭撤兵不比進兵應整旅緩退晝夜亟行成何事體若謂水土惡劣久留徒傷多人然官兵所傷已多再留數日亦不過多傷數人而已焉有因此卽不顧貽誤事

機之理阿桂之意以爲即使得罪情願自任以沽爲眾之名此非阿桂昧良喪心乎人生莫不有死阿桂令眾人感念其死豈能將伊入祀賢良祠果能將國事辦理妥協日後必加恩入祀伊甯不計及此乎至渾覺係隨營最久之人我兵丁傷損情形伊皆目覩將伊遣回是使之告緬匪也傳恆至京自行請罪云遣回渾覺所辦錯謬伊若病勢漸痊朕必不寬貸今病勢昏瞶朕何忍將伊治罪彼時傳恆患病諸事皆由阿桂辦理不過於具奏時列傳恆之名而已豈可諉過於傳恆乎將此傳諭阿桂令其明白回奏朕今並未治伊之罪僅將伊二子革去侍衛嗣後但宜遵旨加意奮勉若仍復如此心存草率貽誤國事應得何罪阿桂自知至蘇爾相至老官屯細目收其器械理宜慷慨奮拒卽爲所戕朕必加恩於其子嗣乃任其鎖屏實屬有玷官職從前達什扎布乃一新降之

厄魯特因不屈罵賊而死彼無子嗣朕尙施恩將伊弟彥扎布補放三等侍衛在乾清門行走蘇爾相何不思抗節邀恩甘受賊辱乎此時諾爾塔若將蘇爾相送回卽派妥員解送來京至綠營員弁殊屬無用卽巡邏撲擊亦不可全仗此輩瘴氣消退之時由京另遣侍衛等員前往將此傳諭阿桂彰寶知之○阿桂覆奏上年七月進剿緬匪係與經略傅恆定議迅辦不意雨多瘴盛致損人畜遣回猛拱土司渾覺原欲藉憤駁戕害結怨於彼未念及告知軍中虛實批若然汝每日在夢中乎又奏未奉旨撤兵以前情駁請降將軍伊勒圖與臣議擬給回書允准傅恆令詢問領隊大臣及侍衛等意見云何眾人意見相同傅恆令將伊等所言逐一畫押未覺傅恆動怒及書押後傅恆怒形於色卽欲褫摺參辦臣等並未多言而退至撤兵雖奏稱二十日實自十七十八兩日將傷

病兵先撤十九日傳恆帶撤兵三千臣與伊勒圖擬於二十日帶兵起程又批汝尙以爲遲眞不足與言矣又奏是日因未得毀船確信又住一日於二十一日撤回其時傳恆尙明白在湖右地方等候同行夜間起程護軍福爾蘇哈被戕實臣疏防迨緬匪改悔觀望又未先發檄諭致失機宜愧恨莫及奏請整軍進剿止因一時憤激今蒙訓示無辭登答又批實係忘恩仍復巧辨汝尙有人心乎將倉遽撤兵之處付之閒言豈非汝之詐術汝視朕爲何如主耶著明白回奏又奏臣辦理不善應從重治罪蒙恩僅將臣二子革去侍衛稍示薄懲予以自新之路惟有竭力報效以贖前愆得旨已有旨了諭軍機大臣等阿桂奉到令其明白回奏之旨雖逐一回奏而詞意之閒仍有自占地步巧言掩飾之處卽如伊恩遠撤兵一節並未明白聲敘於閒言中混過復稱十四日發給緬

子書字於二十一日伊始領兵起程以見伊並未遽退遲遲而歸之意十四日發給緬子書字卽可謂之事畢乎況阿桂原定於二十日退兵因是日緬子進獻物件遲滯一日於二十一起程阿桂摺內乃稱二十日未得拆毀船隻信息是以多宿一日於二十一日退回是狡詐以欺朕也阿桂復有何辭伊視朕爲何如主阿桂甯尙有人心乎竇忘朕恩矣

六月丁丑諭索諾木策凌往密雲捕蝗○己卯諭哈國興昨歲在老官屯於緬匪遣人投誠時自不免存遷就完事之見至諾爾塔所稱哈國興曾許給還土司一節詢之哈國興堅稱並無其語在賊匪一面狡詞難執以坐哈國興之罪而哈國興所稱實未許其給還之處見在無可對質亦難深信其有無伊於綠營粉飾積習未能悛改若仍回滇任事於邊防要務無益但念其屢次領兵打

仗頗屬奮勉尙不至竟予罷斥見在貴州古州鎮總兵余大佐尙未到任其員缺卽著哈國興降補以觀後效余大佐俟有總兵員缺另降諭旨○庚辰禁奉差兵丁私買人口○癸未以劉秉恬爲刑部侍郎

由左副都御史遷

○甲申諭軍機大臣等見在緬匪敢於食言

恣意陸梁特以內地之人不服彼處水土激我進兵賊計甚屬狡狴我若大舉進兵卽墮其術中徒傷士卒轉使賊匪得計此事斷不可行然若竟置之不辦任其猖獗亦無此理宜令賊匪不得休息相機往擊蹂躪其地海蘭察哈國興皆係閱歷之人亦悉賊匪情性阿桂彰寶卽選精兵千名交伊二人或一路行走或分兩路前進令常保住長青各帶兵千名策應遣往之時阿桂彰寶宜剴切曉諭伊等及官兵務宜竭力勦殺斷不可掠取附近獮夷人等塞責亦不可一味深入不能退出務期驚擾賊匪且可退出通盤

計算黽勉從事再哈國興已授爲古州鎮總兵阿桂彰寶將伊調
來之後古州總兵所屬地方緊要卽令貴州提督拜凌阿兼署嗣
後總兵若奉調差務卽照此令提臣兼署○乙酉以范宜賓爲左
副都御史裴宗錫爲安徽布政使由直隸按察使遷○丁亥調官保爲刑
部尙書以素爾訥爲戶部尙書○戊子命英廉索諾木策凌馳勘
熱河水災加倍撫恤○以孫孝愉爲直隸按察使由刑部主事遷○己丑
諭軍機大臣等前據竇光鼐奏各處旗佃應一體出夫捕蝗已批
如所請行復思撲蝗原以保衛田禾非特旗佃當協力赴公卽大
糧莊頭亦不應稍存歧視未知直隸向來作何辦理恐竇光鼐未
能深悉原委因令楊廷璋查明具奏今索諾木策凌回京問及此
事則稱蝗蝻長發處所不但旗佃人等盡力爭撲卽王公屬下旗
人無不協同撲打並會面詢周元理亦稱他處俱係如此辦理等

語看來竇光鼐前奏竟屬荒唐乃伊言之鑿鑿果何所見而云然亦當有所指實著竇光鼐明白回奏並著傳諭楊廷璋將見在確情徹底查明據實覆奏毋得稍有隱飾瞻徇○壬辰諭託庸不必兼署兵部事務所有兵部尙書員缺著豐昇額署理○增火器營翼長並賞生息銀十萬兩以備獎賞○甲午諭邁拉遜兼管之事較多刑部事務難以專辦著以侍郎銜署理內閣學士其刑部侍郎員缺著瑚世泰補授○命伍訥璽馳往古北口會同提督王進泰查勘水災發帑銀二萬兩加倍撫恤並開倉賑糶○以貴州需平糶命阿爾泰德福陳輝祖於四川湖南廣西購運米石備糶○貴州古州逆苗香要就獲並其親屬皆伏誅○乙未諭軍機大臣等據阿桂等奏請派兵三千名分駐隴川遮放至冬閒派員帶領襲取猛密各兵俱令步行裹帶口糧仍派兵二三千以爲後援等

語因所言尙覺奮勉已諭令至期派海蘭察哈國興爲前隊並令阿桂在後策應今思猛密更在老官屯東南我兵前往該處必不能飛越老官屯境地萬一賊人佯爲不知讓我架入而於旱塔馬脖子等處截我歸途不可不慮卽有援兵在後亦止能防其最近一層而老官屯距猛密賊匪路路可通豈能盡爲堵禦再我兵一經分駐賊人斷無不知若猛密謀得信息堅壁清野欲進則無所得退則賊乘我後是腹背受敵爲行兵所最忌且今歲選派之兵不過就滇黔綠營內短中抽長較去歲所派八旗索倫勁旅百不及一轉欲深入重地攻取堅城何所恃以無恐至我兵但令步行以省馬力固爲近理但軍行仗械及火藥鉛丸必需之物自係各兵隨身攜往豈能復有餘力裹糧而一兵所需兩三月之糧卽極爲撙節數亦不少今旣不用馬匹又何法裹帶不知伊等曾否籌

畫及此且賊匪反覆狡詐明欲激我用兵若我所辦局面愈大費用愈多賊人愈爲得計朕意原不過就冬閒瘴退時派兵一二千攻其無備掠取村莊以挫賊勢我得操縱自如有利無害設如阿桂等所議派兵至五六千人已不免於勞費豈不轉墮賊人之術不知伊等如何畫策而貿貿然出於此但萬里之外諸事難以槩爲懸揣或伊等實操必勝之算斷無意外之虞奮勉一往以伸國威豈不甚善見已傳諭阿桂等令將因何如此籌辦之處詳晰回奏哈國興在滇年久緬地情形最爲諳習見在阿桂等所議進兵之路兵行之法是否合宜此舉能否得利哈國興知之必深計之必當且伊卽係領兵之人著傳諭哈國興悉心籌酌直抒所見據實覆奏如哈國興以此事爲可行能把握全勝而無後患則彼原係帶兵之人卽當以此事任之儻非動出萬全則國體所繫自不

可輕爲嘗試哈國興毋稍存調停遷就之見依違兩可負朕詢問之意將此傳諭哈國興知之並鈔寄阿桂等閱看○命再撥內務府銀二萬兩於古北口備賑○丙申諭宗人府奏奉恩將軍普祿病故請將嗣子官成揀選襲職等語普祿係肅親王曾孫因伊父魁亮係貝勒延壽之側福晉所生是以照例准襲奉恩將軍肅親王之孫若無別職僅此奉恩將軍自應准其嗣子承襲見在肅親王之孫內有顯親王承襲其與普祿相類者尙有奉恩將軍額爾德蒙額等五人普祿如有所生之子尙可照例襲職旣已絕嗣復以嗣子承襲殊屬過優從前宗人府以嗣子普順博勒和康麟惠文承襲奉恩將軍已屬錯謬但已加恩亦止准其本身承襲一次不准再襲嗣後王公等孫內如此等照例承襲將軍止有一員實無承祀之人者仍加恩准其嗣子承襲其絕嗣者卽行停止普祿

所出奉恩將軍缺毋庸承襲著爲令○己亥諭軍機大臣等據阿桂彰寶奏今年冬季進兵撲擊徑取猛密司等語朕思此非萬全之策猛密司在老官屯東南地方險遠不惟步兵難行且恐進兵之後賊匪從後襲我或於隘口建柵固守不待接戰我兵卽難退出阿桂等此奏特激於氣憤欲捐軀以塞責耳其自爲計則得矣然未爲朕之官兵計也此仍高視伊等之言論其本心未必卽願捐軀亦不過搖唇鼓舌而已彰寶於兵事未嘗諳練伊又身係總督焉能不與之扶同况彰寶卽知不可行亦不能阻止其咎不在彰寶皆係阿桂逞其狡詐嘗試於朕前朕何如主臣工中取巧者孰能逃朕洞鑒阿桂夫豈不知乃尙敢出此其意何居再此事朕意賊匪此時不過激我進兵以逸待勞何敢犯我邊境見在彼處兵丁除防守關隘外於邊外附近地方稍稍蹂躪尙足敷用雖不

可大舉深入亦不可徒擁重兵坐守邊境仍遵朕前諭乘賊不備
前往掩襲此事關繫甚大不可稍有輕忽惟期辦理有益如不得
遂志卽整旅收兵而回不可深入使賊得計○諭歲屆夏閏王公
大臣官員秋冬俸米卽於七月十五日起支放○諭五經博士凡
遇慶典俱在各本籍隨班行禮停止來京朝賀至衍聖公遇應行
朝賀之事先期奏請著爲令